

四庫全書

子部

欽定四庫全書

子部

古今說海卷十三至  
六

詳校官中書臣吳瓌

員外郎臣牛稔文覆勘

總校官進士臣繆琪

校對官中書臣郭晉

臚錄監生臣范莢

欽定四庫全書

古今說海卷十三

明陸楫編

說選十三 編記十

非戶錄

唐段公路

通犀

通犀置大霧重露下終不沾濡又堪為釵纛挽藥酒酒生  
沫若貯米飼雞雞見輒驚散一呼為駭雞犀或中毒箭

刺于創中立愈蓋犀食百毒棘刺故也

孔雀媒

雷羅數州牧孔雀雛養之使極馴擾致於山野間以物  
絆足傍施羅網伺野孔雀至則倒網掩之無遺一說孔  
雀不足偶但音影相接便有孕如白鴉雌雄相視則孕  
或曰雄鳴上風雌鳴下風亦孕見博物志宋紀曰孝武  
大明五年有獻白孔雀為瑞者愚按說文曰率鳥者繫  
生鳥以來之名曰圍字林音由今獵師有圍也淮南萬

畢衍曰鷓鴣致鳥注云取鷓鴣折其大羽絆其兩足以  
為媒博物志又云鷓鴣一名鷓鴣

### 鷓鴣

衡州南多鷓鴣解嶺南野葛諸菌毒及辟溫瘴又一名

鷓音述多對啼廣志言鷓鴣鳴云但南不北古今注云其

鳴自呼南越志云其鳴自號杜薄州食之亡癘惟本草

說鳴云鈞輶格磔竹客反

### 鷓鴣瘴

廣之南新勤春十州呼為南道多鸚鵡凡養之俗忌以  
手頻觸其背犯者即多病顛而卒土人謂為鸚鵡瘡愚  
親驗之

赤白吉了

普寧有廉州民獲赤白吉了各一頭獻於刺史者其赤  
者尋卒白者久而能言

緋猿

公路咸通十年往高涼程次青山鎮其山多猿有黃緋

者緋者絕大毛彩殷鮮真謂奇獸夫猿則狙獼猱狝之類其色多傳青白玄黃而已今則豈可窮其族類與其猿能伏鼠多羣行猿善啼者其音淒入肝脾方知當一部鼓吹豈獨鼃聲然哉

### 蚺蛇牙

蚺蛇大者長十餘丈圍可七八尺多在樹上候麋鹿過者吸而吞之至鹿消即纏大樹上出其頭角乃不復動夷人伺之以竹籤籤煞之取其膽也故南裔異物志曰

蚺蛇牙長六七寸土人尤重之云辟不祥利遠行賣一  
枚直牛數頭

紅蛇

公路至雷州對岸倚舟候風勢見羣小兒簇二巨蛇各  
長丈餘一如孔雀尾毛色金翠奪目一如真紅色鮮明  
若血又有十餘頭白蛇前後相次若導從俱入一榕藤  
窟內竟不復去故知蛇有草木水土四種其類不可窮  
也又歸化縣有兩頭蛇南越志云無毒夷人餌之兼名



苑云兩頭蛇一名越王約髮俗占見之不祥然論衡引  
楚相孫叔敖事者何也會叢又云渾夕之山有蛇一首  
兩身名曰肥蠶見則大旱管子曰涸水之精名曰螭音威  
一頭兩身以其名呼之可使取魚鱉

### 蛤蚧

蛤蚧首如蟾蜍背綠色上有黃斑點若古錦文長尺餘  
尾絕短其族則守宮蜥蜴蠃蜓多居古木竅間自呼其  
名聲絕大又有十二時亦其類也大者一尺尾長于身

傳云自旦至暮變十二般色傷人必死愚嘗獲一枚閉于籠中玩之止見變黃褐赤黑四色

紅蟹殼

儋州出紅蟹大小殼上多作十二點深黯脂色其殼與

虎蟹堪作疊子按蟹一名蛻

音詭

廣雅云雄曰蜃螳雌曰

搏帶抱朴子又云山中辰日稱無腸公子蟹也古今注

云小蟹一名長卿廣志云蝓

音蝓

小蟹大如貨錢又蟹奴

如榆莢在其腹中生死不相離山海經載千里蟹洞冥

記有貢百足蟹長九尺四螯者今恩州又出石蟹

蛺蝶枝

公路南行歷懸藤峽維舟飲水觀巖側有一木五綵初  
謂丹青之樹因命僮僕采之頃獲一枝尚綴嫩蝶凡二  
十餘箇有翠碧紺縷者金眼丁香眼者紫斑者黑花者  
黃白者緋脈者大如蝙蝠者小如榆莢者愚因登岸視  
乃知木葉化焉是知蝶生江南柑橘樹蠹變為蛺蝶鳥  
足之葉為蝴蝶皆造化使然非虛語也又會要云大食

國西鄰大海嘗遣人乘船經八年未極西岸中有一方石石上有樹幹赤葉青樹生小兒長六七寸見人皆笑動其手脚尻著樹枝其使摘取一枝小兒即死異苑太元中汝南人入山伐木見一竹中央蛇形已成上枝葉如故吳郡桐廬民嘗伐薪遺竹一宿見一蛇化雉頭頸盡就身猶未變此亦竹為蛇蛇為雉也

紅蝙蝠

紅蝙蝠出隴州背深紅色惟翼脈淺黑多雙伏紅蕉花

間採者若獲其一則一不去南人收為媚藥王子年拾遺云有五色蝙蝠異物志鼉蝨魚因風入空木而化為蝙蝠靈枝圖說白蝙蝠服之壽萬歲又媚藥載嗽金鳥辟寒金龍子布穀脚脛骨鵲腦砂稜莖草芍草左行草獨未見錄紅蝙蝠處豈闕載乎又有無風獨搖草男女帶之相媚又陳藏器云榼子蔓生取子中仁帶於衣令人有媚多迷人

### 金龜子

金龜甲蟲也五六月生於草蔓上大於榆莢細視真金  
帖龜子行則成雙其蟲死金色隨滅如螢光也南人收  
以養粉云與養粉相宜

乳穴魚

全義之西南有山曰盤龍山有乳洞乳洞有金沙龍盤  
魚皆四足修尾丹腹狀若守宮游泳水濱人莫敢犯按  
御覽云龍蟠山有石洞洞中小水水有四足魚皆如龍  
形人殺之即風雨也然唐韻云鱮魚名四足山海經云

人魚如鱖音啼魚四脚出丹洛二水有鮓大者謂之鮓音退

爾雅注鮓似鮓四足聲似小兒但未見言其可致風雨

耳公路因思道書說五頭魚三足鹿皆神化所致可以

以類而推也若以魚之異者則澧水之魚名朱鱖六足

有珠又歷澗潭有五色魚又丹水出丹魚割血以塗足

下則可步履水上又翔法師云鱖音薺魚一首十身博物

志云金魚腦中有麩金出印婆塞江又吳王食膾有餘

棄江中為魚今名吳王鱖餘者長數寸又魏武四時食

制曰望魚側如刀可以割草出豫章白髮魚戴髮形如  
婦人白肥無鱗出滇池又郭延生述征記曰城陽縣南  
堯母慶都墓廟前一池魚頭間有印文謂之印頰魚非  
告祠者捕不得又臨海異物志云鰓魚如指長七八寸

但有脊骨曝作燭極有光明又比目魚一名鰈音榻一名鱧

沈懷遠南越志謂之板魚亦曰左介介亦作鮓吳都賦  
云雙則比目片則王餘異物志南方鏡魚圓如鏡也又

異苑云鮓音隔魚凡諸魚欲產鮓魚輒以頭衝其腹世謂



衆魚之生母又臨海水土異物志鹿魚頭上有兩角如

鹿又云鮫

閩蒸反

魚腹背有刺如三角菱又神異經黃公

魚長七八尺狀如醴魚以烏梅二七煮之即熟食之無鯁

### 魚種

南海諸郡人至八九月於池塘間采魚子著草上懸於  
竈煙上至二月春雷發時却收草浸于池塘間旬日內  
如蝦蟆子狀鬻於市號魚種育池塘間一年內可供口  
腹也愚按陶朱公養魚經曰朱公謂威王治生之法有

五水畜第一水畜魚也又拂林國有羊羔生于土中然其臍與地連割之則死惟人著甲走馬擊鼓駭之其羔驚鳴而臍絕便逐草矣博物志云取鱉劉如棋搗赤菴汁和令厚以茅包之六月中投於池澤間經旬變鱉成鱉也

水母

水母一名蚌一名石鏡南人治而食之云性熱偏療河魚疾也

蚊母扇

端新州有鳥類青鯢而嘴大常在池塘間捕魚而食每作一聲則有蚊子羣出其口按爾雅曰鷓鳥似鳥而大廣志云蚊母此鳥吐出蚊也土人云其翅堪為扇惟辟蚊子與陳藏器說同又云塞北有蚤母草嶺南蚤母木南越志云古度樹一呼椰子南人號曰柁日亞反不華而實實從木皮中出如綴珠璫其實大如櫻桃黃即可食過則實中化蛾飛出亦有為蚊子者

鵝毛被

鵝毛被邕之南有酋豪多熟鵝毛為被如稻畦衲之其  
溫軟不下綿絮也

紅蝦盃

紅蝦出潮州潘州南巴縣大者長二尺土人多理為盃  
王子年拾遺云大蝦長一尺鬚可為簪洞冥記載鬚杖  
兼名苑云廣州獻蝦頭盃簡文將盛酒無故自躍乃不  
復用愚又按毛詩義貝大者有一尺六七寸今九真交

趾以為孟盤實奇物也

### 鷄毛筆

番禺諸郡多以青羊毫為筆韶州擇鷄毛為筆亦有圓如錐方如鑿可抄寫細字者昔溪源有鴨毛筆以山雞

毛雀雉毛間之五色可愛筆有豐狐之毫

博子云漢末筆虎僕

之毛

博物似豹毛可為筆

蚰蛉鼠毛

廣志可為筆

鼠鬚

均州出

殺毳羊毛

印州取族毛

麝毛狸毛

鄭慶云麝毛筆一管寫書直行四十張狸毛筆一管畝行寫書八百張

馬毛

嘉州出

羊鬚

陶隱居燒丹封鼎除用羊鬚筆

胎髮

弗樞以小兒髮為筆柱鄭慶云蕭祭

酒常龍筋拾遺記為之然未若兔毫

雞卵卜

邕州之南有善行術者取雞卵墨畫祝而煮之剖為二片以驗其黃然後決嫌疑定禍福言如響答據此乃古法也神仙傳曰人有病就茅君請福煮雞子十枚以內帳中須臾茅君擲出中無黃者病多愈有黃者不愈常以此為候愚又見卜者流雜書傳虎卜紫姑卜牛蹄卜灼骨卜鳥卜雖不法於著龜亦有可稱者

雞骨卜

南方逐除夜及將發船皆殺雞擇骨為卜傳古法也卜吉即以肉祠船神呼為孟公孟姥其來尚矣按梁簡文船神記云船神名馮耳五行書云下船三拜三呼其名除百忌又呼為孟公孟姥劉思真云玄冥為水官死為水神冥孟聲相似又云孟公父名憤母名衣孟姥父名板母名履或云冥父冥母即玄冥也

象鼻灸

廣之屬城循州雷州皆產黑象牙小而紅土人捕之爭食其鼻云肥脆偏堪為炙愚按象有十二肉陳藏器云惟鼻是其本肉諸即雜肉梁翔法師云象一名伽那古訓云象孕子五歲始生

鵝毛脰

恩州出鵝毛脰乃鹽藏其味絕美其細如針郭義恭云小魚一斤千頭未之過也

枕椰炙



枕椰莖葉與波斯棗古散

古散堪為拄杖

椰子檳榔小異其木

如莎樹皮穰木皮出麪可食洛陽伽藍記云昭儀寺有酒樹麪木得非枕椰乎其心為炙滋腴極美

### 紅鹽

恩州有鹽場色如絳雪驗之即由煎時染成差可愛也  
鄭公虔云琴湖池桃花鹽色如桃花隨月盈縮在張掖  
西北按鹽有赤鹽紫鹽黑鹽青鹽黃鹽亦有如虎如印  
如織如石如水精狀者

米麩

廣州南尚米麩合生熟粉為之白薄而軟按劉孝威謝官賜交州米麩四百屈詳其言屈豈今之數乎且前朝

短書雜說有呼食為頭

梁元帝謝賜功德淨饌一頭又謝齋功德食一頭又劉孝威謝

賜果食一頭

以魚為蚪

梁科律生魚若干斗

茗為薄為夾

溫貢茗二百尺薄又梁科

律薄茗千夾云云

筆為雙為床為枚

搜神記益州西神祠祈禱者持一雙筆南朝呼筆四

管為一床梁簡文帝答書云乍置筆床又云寫書筆一枚一萬字

墨為螺為丸為枚

陸云

以兄送墨二螺梁科律御墨一量十二九蔡質漢官紙儀曰尚書令僕丞郎月賜諭糜大墨一枚小墨一枚紙

為番錦為兩

王佐云幣錦二兩

衣為裁

陸倕謝安城王楚越衣二裁沈約有謝葛衫二

裁袞裝為緣

簡文帝云蒙惠袞裝一緣

奴為頭

簡文帝書言安城王餉胡子一頭

麝

為子蠟為麩

麝香如干子蠟如干麩齊建武四年事

擯榔為口胡桃為子

陸倕謝安成王賜擯榔二千口并胡桃一十子

其事不可備論

### 睡菜

睡菜五六月生田塘中葉類茨菰根如藕梢土人採根為鹽菹或云食之好睡郭子橫云五味草食之不使人睡亦名却睡草

水韭

水韭生於池塘中葉似韭得非龍爪薤乎字林云

嚴音

水中野韭也又吟

音吟

見字林似蒜生水中

薤菜

薤菜葉如柳三月生陳藏器云主解胡蔓草毒胡蔓即

野葛也愚按廣之菜有掉

辛菜也

東風

味如酪香蕊音戢氣似馬蘭蕊蜀人

所謂

菡

音晶菡菡苗也

之類無足奇者吳志孫皓時有賈

音賈

晉安帝義熙二年有苦蕒菜生揚州國初建達國獻佛

土萊泥婆國獻波稜菜

斑皮竹筍

湘源縣十二月食斑皮竹筍諸筍無以及之吳錄云馬  
援至荔浦見冬筍名曰苞筍博物志曰斑皮竹堯女以  
涕揮竹竹盡斑也爾雅曰筍竹之萌說文曰筍竹胎詩  
疏義筍皆四月生巴竹筍生八月筍音媚竹筍冬夏生永  
嘉記含墜竹筍六月生愚按山海經竹生花其年便枯  
六十年一易根必結實而枯死實落土復生六年還成

町也竹譜曰葑必六十年篔亦六年是也南中有以竹  
為刀錯子者如少鈍復以漿水洗之如初廣州記云石  
林竹勁利削為刀切截象皮如截草也愚聞貞元五年  
番禺有海戶犯鹽禁避罪羅浮山入至第十三嶺遇巨  
竹千百萬竿竹圍二十一尺有三十九節節長二丈海  
戶因破之為篔會罷吏捕逐挈而歸時有軍人獲一  
篔以為奇貨後獻于刺史李復復命陸子羽圖而記之  
許氏說文有長節竹謂之筵

音鍾

得非羅浮山龍鍾之義

乎

無核荔枝

南方果之美者有荔枝梧州火山者夏初先熟而味少劣其高潘州者最佳五六月方熟有無核類雞卵大者其肪瑩白不減水精性熱液甘乃奇實也

變柑

新州出變柑有苞大於升者且皮薄如洞庭之橘餘柑之所弗及傳云移植不數百里形味俱變因以為名亦

如踰淮為枳乃水土異也

檄攬子

八九月熟其大如棗廣志云有大如雞子者有野生者  
高不可梯但刻其根方數寸許入鹽於中子皆落矣今  
高涼有銀坑檄攬子細長味美於諸郡產者其價亦貴  
陳藏器云其木主解鯢魚毒此木作檄揆著鯢魚皆浮出  
山橘子

冬熟有大如土瓜者次如彈丸者皮薄下氣普寧多有



之

山胡桃

山胡桃皮厚底平狀如檳榔

白楊梅

楊梅葉如龍眼樹如冬青一名杙音求潘州有白色者甜而

絕大

偏核桃

占卑國出偏核桃形如半月狀波斯人取食之絕香美

紅梅

嶺南之梅小於江左居人采之雜以朱槿花和鹽曝之  
梅為槿花所染其色可愛又有選大梅刻鏤瓶罐結帶  
之類取棹汁漬之棹木葉汁亦甚甘脆

五色藤筌蹄

瓊州出五色藤合子書囊之類細于錦綺亦藤工之妙  
手也新州作五色藤筌臺皆一時之精絕者梁劉孝儀  
謝太子五色藤筌蹄一枚云炎州采藤麗窮綺褥得非

筌臺與筌蹄語訛歟

香皮紙

羅州多棧香樹身如拒柳皮堪搗紙土人號為香皮紙

抱木屨

抱木產水中葉細如檜其身堅類栢惟根軟不勝刀鋸  
今潮州新州多剗之為屨

紅藤篔

瓊州出紅篔一呼為篔或謂之蘧蔴亦謂之行唐其色

殷紅瑩而不垢

方竹杖

澄州產方竹體如削成勁挺堪為杖亦不讓張騫節竹

杖也其融州亦出大者數丈又海晏地名出蘆堪為拄杖

高潘州出千歲蕨拄杖之類具多更有疎節竹五六尺一節

僧道多以為杖又按會最云漆州通竹直上無節空心也

山花燕脂

山花叢生端州山崦間多有之其葉類藍其花似蓼正月開花土人採含苞者賣之用為葵脂粉或時染帛其紅不下紅藍又鄭公虔云石榴花堪作燕脂

### 鶴子草

鶴子草蔓花也當夏開南人云是媚草甚神可比懷草夢芝采之曝乾以代面靨形如飛鶴狀翅羽嘴距無不畢備亦草之奇者草蔓延春生雙蟲常食其葉土人收於匳粉間飼之如養蠶法蟲老不食而蛻為蝶女子佩

之如細鳥皮號為媚蝶郭子橫記勒畢獻細鳥以方尺  
玉籠盛數百形大如蠅狀如鸚鵡聲聞數百里間如黃  
鵠也國人以此為候日畧亦曰候日蟲帝得之旬日飛  
盡明年有細鳥集於帷帟或襲人衣袖因名蟬衣宮內  
嬪御有鳥集其衣者輒蒙愛幸至武帝末稍稍自死人  
服其皮者多為丈夫所媚余訪花子事如面光眉翠月  
黃星靨其來尚矣然事有相類者見拾遺引孫和悅鄧  
夫人嘗置膝上和月下舞水晶如意誤傷夫人頰流血

染袴和自舐瘡太醫曰獺髓雜玉及琥珀屑當滅痕和  
乃作膏琥珀太多痕未滅而頰有赤點細視之更益其  
妍諸嬖要寵者以丹青點頰而後進幸一說上官昭容  
自製花子以掩黥處

### 越王竹

嚴州產越王竹根於石上狀若荻枝高尺餘土人用代  
酒籌次有沙筍產于海島間其心若骨可為籌筍凡欲  
采者須輕步拔之不爾聞人行聲則縮入沙中不可取

陳藏器云越王餘算味醜生南海長尺許

無名花

廣州之南數百里有蔓草生吐一葉白花片大如掌初夏開徧問土人莫有知者

指甲花

花細白絕芳香番人重之未詳其名又耶悉弭花白茉莉花

紅者

不香

皆波斯移植夏中如金錢花也本出外國大

同二年始來中土又扶南傳曰頓遜國有區撥花葉逆



花致酒花摩夷花唐初罽賓國獻供佛頭花伽趺畢國  
獻泥樓鉢羅花皆中國所無者

### 相思子

相思子有蔓生者與龍腦相宜能令香不耗于寶搜神  
記云大夫韓馮妻美宋康王奪之馮自殺妻自投臺下  
死王怒令冢相望宿昔有文梓木生二冢之端根交于  
下枝錯其上宋王哀之因號其木曰相思樹

### 睡蓮

睡蓮葉如荇而大浮於水面其花布葉數重凡五種色  
當夏晝開夜縮入水底晝復出也與夢草晝入地夜即  
復出一何背哉

古今說海卷十三

欽定四庫全書

古今說海卷十四

明陸楫編

說選十四

偏記十一

西使記

元劉郁

壬子歲皇弟錫喇統諸軍奉詔西征凡六年拓境幾萬

里己未正月甲子常德

字仁卿

馳驛西覲自和林出烏遜

珠勒西北行二百餘里地漸高八站經瀚海地極高寒雖

暑酷雪不消山石皆松文西南七日過瀚海行三百里地漸下有河闊數里曰昏木輦夏漲以舟楫濟數日過龍骨河復西北行與巴實伯里南以相直近五百里多漢民有二麥黍穀河西注瀦為海約千餘里曰赫色勒巴斯多魚可食有碾磴亦以水激之行漸西有城曰伊滿又西南行過博囉城所種皆麥稻山多栢不能株絡石而長城居肆圍間錯土屋牕戶皆琉璃城北有海鐵山風出往往吹行人墮海中西南行二十里有關曰特

穆爾錫濟木守關者皆漢民關徑崎嶇似棧道出關至阿爾錫爾城市井皆流水交貫有諸果唯瓜蒲萄石榴最佳回紇與漢民雜居其俗漸染頗似中國又南有楚瑪爾城居民多并汾人有獸似虎毛厚金色無文善傷人有蟲如蛛毒中人則煩渴飲水立死惟過醉蒲萄酒吐則解有嗜酒博羅城迤西金銀銅為錢有文而無孔方至瑪阿中以馬犖拖床遞鋪負重而行疾或曰奇爾濟蘇易馬以犬二月二十四日過亦堵兩山間土平民夥

溝洫映帶多故壘環垣問之蓋契丹故居也計其地去和林萬五千里而近有河曰亦運流洶洶東注土人云此黃河也二十八日過德呼蘇五日夜宿賽哩木城有浮圖諸回紇祈拜之所三日過別石蘭諸回紇貿易如上已節四日過忽章河渡船如弓鞋然土人云河源出南大山地多產玉疑為崑崙山以西多龜蛇行相雜郵亭客舍甃如浴室門戶皆以琉璃飾之民賦歲止輸金錢十文然貧富有差八日過塔什干城大而民繁時羣

花正開唯梨花薔薇玫瑰如中國餘多不能名城之西  
所植皆蒲萄粳稻有麥亦秋種滿地產藥十數種皆中  
國所無藥物療疾甚效曰阿只爾狀如苦參治馬鼠瘡  
婦人損胎及打撲內損用豆許嚙之自消曰阿息爾狀  
如地骨皮治婦人產後衣不下又治金瘡膿不出嚙碎  
傅瘡上即出曰尼格薩勒形似桔梗治金瘡及腸與筋  
斷者嚼碎傳之自續餘不能盡錄十四日過安巴河夏  
不雨秋則雨溉田以水地多蝗有鳥飛食之十九日過

里丑城其地有桑棗征西奧魯屯駐于此二十六日過馬蘭城又過納商城草皆苜宿藩籬以柏二十九日過殫埽兒城滿山皆鹽如水晶狀近西南六七里新得國曰木乃奚牛皆駝峯黑色地無水土人隔山嶺鑿井相泐數十里下通流以溉田所屬山城三百六十已而皆下惟檐寒西一山城名奇都卜孤峯峻絕不能矢石丙辰年王師至城下城絕高險仰視之帽為墮諸道並進敵大驚令相大者納克實勒來納款已而烏爾古迺蘓勒坦



出降蘇勒坦猶國王也其父領兵別據山城令其子取之  
七日而陷金玉寶物甚多一帶有直銀千笏者其國兵  
皆刺客俗見男子勇壯者以利誘之令手刃父兄然後  
充兵醉酒扶入窟室娛以音樂美女縱其欲數日復置  
故處既醒問其所見教之能為刺客死則享福如此因  
授以經呪日誦蓋使盡其心志死無悔也令潛使未服  
之國必刺其主而後已雖婦人亦然其木乃奚在西域  
中最為兇悍威脅鄰國霸四十餘年王師既克誅之無

遺類四月六日過奇拉爾城所產蛇皆四跗長五尺餘  
首黑身黃皮如鯊魚口吐紫艷過阿喇迪城瑪資捺勒  
人被髮率以紅帕勒首衣青如鬼然王師自入西域降  
者幾三十國有佛國名克什密爾在印毒西北蓋傳釋  
迦氏衣鉢者其人儀狀甚古如世所繪達摩像不如葷  
酒日啖粳一合所談皆佛法禪定至暮方語丁巳歲取  
報達國南北二千里其王曰赫佛里其城有東西城中  
有大河西城無壁壘東城固之以甃繪其上甚盛王師

至城下一交戰破勝兵四十餘萬西城陷皆盡屠其民  
尋圍東城六日而破死者以數十萬計赫佛里以舸走獲  
馬其國俗富庶為西域冠宮殿皆以沈檀烏木降真為  
之壁皆以黑白玉為之金珠珍貝不可勝計其妃后皆  
漢人所產大珠曰太歲彈蘭石瑟瑟金剛鑽之類帶有  
直千金者其國六百餘年傳四十主至赫佛里而亡人  
物頗秀於諸國所產馬名托必楚赫佛里不悅以橙漿  
和糖為飲琵琶三十六絃初赫佛里患頭痛醫不能治

一伶人作新琵琶七十二絃聽之立解土人相傳報達  
諸羌之祖故諸羌皆臣服報達之西馬行二十日有天  
房內有天使神羌之祖葬所也師名派哈木帕爾房中懸  
鐵絙以手捫之心誠可及不誠者竟不得捫經文甚多  
皆派哈木帕爾所作轄大城數十其民富實西有密奇爾  
國尤富地產金人夜視有光處誌之以灰翼日發之有  
大如橐者至報達六千餘里國西即海海西有富浪國  
婦人衣冠如世所畫菩薩狀男子異服皆善寢不去衣

雖夫婦亦異處有大鳥駝蹄蒼色鼓翅而行高丈餘食  
火其聲與凡鳥異羅子國出珍珠其王名鄂斯阿塔畢  
云西南海也採珠盛以革囊止露兩手腰絙石墜入海  
手取蚌并泥沙貯于囊中遇惡蟲以醋噴之即去既得  
蚌滿囊撼絙舟人引出之往往有死者印毒國去中國  
最近軍民一千二百萬戶所出細藥大胡桃珠寶烏木  
雞舌鎖鐵諸物國中懸大鐘有訴者擊之司鐘者紀其  
事及時王官亦紀其名以防姦欺民居以蒲為屋夏大

熱人處水中已未年七月烏凌國阿喇迪蘇勒坦來降城  
大小一百二十民一百七十萬山產銀黑契丹國名齊  
拉袞王名和卓瑪迪音蘓勒坦聞王大賢亦來降其托里斯  
大城獅子雄者鬃尾如纓拂傷人吼則聲從腹中出馬  
聞之怖溺血狼有鬃孔雀如中國畫者惟尾在翅內每  
日中振羽香猫似土豹糞溺皆香如麝鸚鵡多五色風  
馳急使乘日可千里鵝鴿傳日亦千里珊瑚出西南海  
取以鐵網高有至三尺者蘭赤生西南海山石中有五

色鴨思價最高金剛鑽出印毒以肉投大澗底飛鳥食其肉  
糞中得之薩巴爾出西海中蓋毒瑁之遺精蛟魚食之吐出  
年深結成價如金其假者即犀牛糞為之也骨篤犀大蛇之角  
也解諸毒龍種馬出西海中有鱗角牝馬有駒不敢同牧被  
引入海不復出阜鷗一產三卵內一卵生犬灰色而毛  
短隨母影而走所逐禽無不獲者壠種羊出西海以羊  
臍種土中溉以水聞雷而生臍系地中及長驚以木臍  
斷便行嚙草至秋可食臍內復有種又一胡婦解馬語

即知吉凶甚驗其怪異等事不可殫紀往返凡一十四月郁歎曰西域之開始自張騫其土地山川固在也然世代浸遠國號變易事亦難考今之所謂瀚海者即古金山也印毒即漢身毒也曰駝鳥者即安息所產大馬爵也密奇爾即唐拂菻地也觀其土產風俗可知已又新唐書載拂菻去京師四萬里在西海上所產珍異之物與今日地里正同蓋無疑也中統四年三月劉郁記

古今說海卷十四



欽定四庫全書

古今說海卷十五

明陸楫編

說選十五

偏記十二

北轅錄

宋周燁

淳熙丙申十一月二十九日詔待制敷文閣張子政假  
試戶部尚書充賀金國生辰使皇叔祖右監門衛大將  
軍士褒假明州觀察使知東上閣門兼客省四方館事

副之明年正月七日陞辭出國門初九日離行在二十一日至淮陰二十六日燕館習儀二十八日北行引接傳御使副即館坐受其謁上中節序立其傍金遣接伴使昭武大將軍尚書戶部郎中李侉廣威將軍尚書兵部員外郎完顏宗卞僕賓立飲引接三盃而退二十九日盱眙置酒餞使介渡淮午至泗州津亭使副望拜如儀接伴戎服陪立各帶銀牌牌樣如方響上有蕃書急速走遞四字上有御押其狀如主字金法出使皆帶牌

有金銀木之別朝服對立于庭至展起居狀三節人講  
叅禮使副陞廳茶酒三行金法先湯後茶少頃聯轡入  
城夾道甲士執兵直抵於館旋供晚食果飮如南方齋  
筵先設茶筵一般若七夕乞巧其瓦瓏桂皮雞腸銀鋌  
金剛蠲西施舌取其形密和麩油煎之金人甚珍此茶食  
謂未行酒先設此品進次供饅頭血羹畢羅肚羹盪羊  
餅子解粥肉齋羹索麩骨頭盤子自後大同小異酒味  
甚漓食畢即鎖門內外不通二月一日甫交曉間接伴

所晨衙三節謂北家聲喏各相呼而起時猶未至三鼓旋覓盃水洗漱冠擲畢點心已至灌肺油餅棗糕麩粥有供糕糜處或未暇舉筋忽一人呼官員認馬三節出門馬已預定上一上二貼於背上以防差誤馬科於民謂之戶馬御者不俟據鞍即散蓋防與之話言泄機事也細車四輛奉南北使副亦以序行車之形製既不美觀出館各有細紗二燭籠為導氣象甚不佳亦有差管從後聲頓悽怨永夜修途行人為之感愴車每輛用驢

十五頭把車五六人行差違以巨槌數手驢謂之走車其  
震蕩如逆風上下波濤間麤車三十六輛每輛輓以四  
牛禮物私覲使介三節行李皆在馬自起程至三許折  
車真定汴京  
燕山也蓋常先一兩程而往來人夫及輓車牛驢  
至州縣更易六十里至臨淮縣縣有徐城本徐國有徐君  
墓季札掛劍處即此是日行循汴河河水極淺洛口即  
塞理固應然承平漕江淮米六百萬石自揚子達京師  
不過四十日五十年後乃成污渠可寓一笑隋隄之柳

無復彷彿矣二日至虹縣晚宿靈璧縣汴河自此斷流

自過泗地皆荒瘠兩岸奇石可愛

石產於縣鳳凰山以小為貴

或云

花石綱所棄者虞姬墓在西岸雖無碑却有村曠名陰

陵靈壁舊為鎮本隋虹州地虹本紅陽夏丘二縣地漢

書紅陽侯立是也訛而不改遂名曰虹五日至永城縣

縣本敬丘縣地漢更敬丘曰太丘陳寔為之長縣北有

芒山與碭山相接六日至穀熟縣十八里至南京入陽

熙門市樓榜曰睢陽夾道甲兵甚盛張巡許遠廟在西

門外謂之雙忠廟其傍則宋玉臺此地高辛氏子閼伯所居商丘也武王封微子啓為宋國後唐號歸德軍本朝王業所基陞為南京詔即衙域以為大內以歸德為名後陞應天府太上皇於此登位金人今改歸德府及門數妓來迓北使率皆騎驢不約束步武便乘騎也入境男子衣皆小窄婦女衫皆極寬大有位者便服亦止用阜紵絲或番羅繫版縑與阜隸畧無分別縑反挿垂頭於腰謂之有禮無貴賤皆著尖頭靴所頂之巾謂之

蹋鷓七日至寧陵縣縣本寧城古葛伯國六國時屬魏為  
信陵君無忌之封宿拱州襄陵驛金人改曰濰州濰河  
在十里外本襄邑縣宋襄公葬于此故曰襄陵八日至  
雍丘縣縣故杞國武王封禹後東樓公縣東有葵丘齊  
桓公所會也行二十里過空桑伊尹所生之地又里許即  
伊尹墓地名三家次過范郎廟其地名孟莊廟塑孟  
姜女偶坐配享者蒙恬將軍也又六十里至陳留縣  
縣本鄭邑為陳所并故名實張良之封邑或云陳思



王亦生於此九日至東京金人改曰南京未到城先過  
皇城寺宜春苑使副易朝服三節更衣帶從跨馬入新  
宋門舊曰朝陽金人名洪仁樓櫓濠塹甚設次入甕城  
次入大城人煙極凋殘至會同館舊貢院也接伴所得  
私覲盡貨於此行戶倍償其價晚食酒貯以黃缸味差  
勝有以柑子餉承應人得之甚喜云謂之孔果子按東  
京春秋衛陳鄭三國之境古大梁城也十三日至黃河  
浮航以渡自南抵北用船八十五隻各闊一丈六七尺

其布置相去又各丈餘上實筭子木復覆以草曳車牽馬而過如履平地金人以順天名橋予觀駢頭巨艦綽以寸金規制堅壯埽兵守護甚嚴不日我國家恢復河朔過師枕席上云當知此橋為利之博焉十八里至建津津即袁紹渡處十四日至湯陰縣湯陰本蕩陰晉侍中嵇紹死節之所又有美里城美河美市文王所囚之地十五日至相州闌闌繁盛觀者如堵二樓曰康樂曰月白風清又二樓曰翠樓曰秦樓時方賣酒其上牌書十

洲春色酒名也或云韓魏公畫錦堂今為一貴人宅石  
記猶在好事者叩門打碑不禁也相出茜草故顯名天  
下銅雀臺講武城漳河紂之朝歌城皆在境內講武南  
有塔間是舊鄴於高丘相望名七十二塚世謂曹孟德  
狙詐惑後人使迷其葬所相實古鄴相魏文侯始封之  
地十六日至邯鄲縣縣古趙國邯山名鄲盡也邯山至  
此而盡凡城郭字從邑故字皆從邑趙王叢臺在縣之  
北聞每年三月二十四日空巷上簡子塚塚形如硯世

謂硯子塚程嬰公孫杵臼墓亦在馬路逢一細車蓋以  
 青氈頭段人家也頭段者謂貴族及將相之家十七日  
 至邢州古鉅鹿郡故邢侯國也秦兼天下於此置信都  
 縣十八日至內丘縣內丘本漢之中丘未至內丘西望  
 太行山岡巒北走崖谷秀傑如昔所聞山延袤八十里  
 十九日至栢鄉縣縣本春秋晉郭邑之地漢光武即位  
 於鄗之南六十里至趙州道經光武廟有二石人首橫  
 於路俗傳光武欲渡河二人致餉慮洩其蹤乃除之又

云遇二人問途不答怒而斬之已而皆石也未至城五里渡石橋橋從空架起工極堅緻南北長十三丈闊四之一實隋人李春所造元祐間賜名安濟有張果老驢迹二十日至正定府未至城先過滹沱河河流不甚闊聞當春漲時殊湍急也正定在春秋時屬鮮虞國二十二日至新樂縣縣古鮮虞國漢中山孝王母馬昭儀隨王就國王於是建宮於樂里而呼為西樂城語訛西為新四十五里至中山府堯始封于此二十四日至安肅

軍過白溝河二十五日至涿州黃帝戰蚩尤於涿鹿即  
此地二十六日至良鄉縣入內遣侍郎李慶和賜銀合  
湯藥貼用紅綾勅書云勅某卿遠持慶幣來賀誕辰馳  
華隰以良勞次郊亭而伊邇宜有節宣之醜以彰眷遇  
之優二十七日過盧溝河即盧龍也燕人呼水為龍呼  
黑為盧亦謂黑水河色黑而濁其急如箭至燕山府外  
燕賓館赴班荆宴少定傳銜館伴使昭武大將軍太子  
少詹事富察明少中大夫侍御史鄧儼為之副南使與

之互展起居狀繼與接伴互展辭狀天使敬昊賜宴單  
仲賜酒果酒九行禮畢趨入城初入端禮門次入南門  
次入豐宜門次過龍津樓樓亦分三道通用玉石為闌  
闌上琢為嬰兒狀極工巧次入宣陽門由馳道西南入  
會同館甫就次有天使完顏汴傳宣撫問二十八日忠  
勇校尉劉彥忠翊校尉何彥來交禮物天使烏古論  
賜酒果宣威將軍充東上閣門副使郭喜說朝見儀二  
十九日辨色使副率三節入見行司捧國書於馬上前

行初出館橫過馳道行而御廊東西曲尺各二百五十  
間至掖門下馬自專德門由會通承明二門入左嘉會  
門趨而南至幕次少頃鳴鐘鐘罷衛士山呼百官裏見  
時方辰正斯須於幕間見曳玉帶者五人先出後知為  
東宮親王平章令公也繼獨引使副捧國書頃之閣門  
綠衣吏來引都轄都轄三節之長以下先入宣明門次仁政門  
於隔門上面北序立門之裏即殿庭隙門見使副舞蹈  
之節俟禮物過使副由右出三節自東入拜于大氊上



上有一品至七品黑漆黃字牌子蓋其朝序也一氈可容數百人遍地製成鸞鳳殿九楹前設露臺柱衣文繡兩廊各三十間中有鐘鼓樓廊外垂金漆簾額飾以繡廊之西馬有鞞紅繡鞍者數疋乃高麗所進殿門外衛士二三百人分兩傍立盡戴金花帽錦袍宣明門外直至外廊皆甲士青緇甲居左旗執黃龍紅緇甲居右旗執紅龍外廊皆銀鎗左掖門入皆金鎗人依一柱以立馬仁政門左門用甲士訖見無一人跛倚者凡門屋下

皆青隊執弓矢人數各有差若乃經從之處宮殿門名  
茲不具載北宮營繕之制初雖取則東都而竭民膏血  
終殫土木之費瓦悉覆以琉璃日色輝映樓觀翬飛圖  
畫莫克摹寫建造之初役民兵一百二十萬數年方就  
死者不計其數三節既出副使疾作依柱以立扶策至  
幕次未畢餘禮小底入報小底二  
百人傳旨免禮數至於殿  
門外受衣帶三節繼之是日麗夏使人同見少留俟其  
禮竟閣門來引復舊路出至嘉會門駐立久之以麗人

在門外受賜未畢也歸館久之宣威將軍客省使兼東  
上閣門盧璣到館押伴置酒殿上近例止就賜使副免  
坐第拜表謝三節各受衣帶五事尚書公獨以病辭館  
伴所服以禮例應給使副衣帶各七事有靴而無笏金  
國無象簡所用皆木屨也三十日就館宴天使李顯全  
賜宴并酒果燕山酒固佳是日所餉極為醇厚名金澗  
盖用金澗水以釀之也三月一日雨免入賀不爾必致  
霑服失容有習來此者言雖雨立移時不恤也二日天

使完顏奕賜分食者分御膳以賜之也九日入辭使副  
受書而歸十日離館燕古冀州地武王封堯後於薊即  
薊縣也隋立涿郡唐為幽州天寶間曰范陽郡陞為盧  
龍軍遼曰燕京名析津府皇朝改曰燕山府金曰大興  
府二十三日至東都未至城三二里車夫指一土岡云  
是名愁臺乃晉少帝北狩之路二十四日押宴鎮國上  
將軍鎮南軍節度使兼懷州管內觀察使高蘇賜宴并  
酒果天使趙泳食畢啓行四月十六日至家是行往返

凡九十六日

凡九十六日

古今說海

十一

古今說海卷十五

欽定四庫全書

古今說海卷十六

明陸楫編

說選十六

偏記十三

滇載記

明楊慎

滇域未通中國之先有低牟苴者居永昌哀牢之山麓  
今金有婦曰沙壹浣絮水中觸沈木若有感是生九男  
函地曰九隆族種類滋長支裔蔓衍竊據土地散居谿谷分

為九十九部其渠酋有六各號為詔夷語謂詔為王其

一曰蒙舍詔

今蒙化府

其二曰浪施詔

今浪穹縣

其三曰鄧賧詔

今鄧州

其四曰施浪詔

今浪穹縣

其五曰摩些詔

今麗江府

其六曰蒙雋詔

今建昌

兵埒不能相君長至漢有仁果時

九隆八族之四世孫也強大居昆彌川

今白崖定西嶺

傳十七

世至龍祐那當蜀漢建興三年諸葛武侯南征雍閩師

次白崖川獲閩斬之封龍祐那為酋長賜姓張氏割永

昌益州地置雲南郡於白崖諸夷慕武侯之德漸去山



林徙居平地建城邑務農桑諸部於是始有姓氏龍祐  
那之十六世孫曰張樂進求遜位于蒙氏考其時蓋唐  
世也張氏或稱昆彌國或稱白國或稱建寧國其年系  
莫可推詳

蒙氏始興曰細奴羅九隆五族年苴篤之三十六世孫  
也耕于魏山之麓數有神異孳牧繁息部衆日盛代張  
氏立國號曰封民蒙氏偽稱南詔實唐貞觀三年也遷  
居瓏玕圖山

今蒙化

及高宗時遣子入侍朝命授細奴羅

以魏州刺史死偽謚高祖又稱奇王子羅晟嗣

羅晟僭立當高宗上元元年至睿宗景雲中姚州蠻先  
附吐蕃御史李知古請兵擊降之築城置州縣重稅賦  
因誅其豪雋掠其子女為奴婢羣蠻怨怒引吐蕃攻知  
古殺之於是姚雋路絕晟猶奉唐正朔死偽謚世宗子  
晟羅皮嗣

晟羅皮之立當玄宗先天元年立孔子廟于國中死謚  
威成王子皮羅閣嗣

皮羅閣之立當玄宗開元二十六年受唐冊封為雲南王  
賜名歸義於是南詔寢強大而五詔微弱皮羅閣因仲  
夏二十五日祭先之期建松明為樓以會五詔宴醉後  
羅閣佯下樓擊鼓舉火焚樓五詔遂滅閣賂劍南節度  
使求合五詔為一朝廷許之於是盡有雲南之地因破  
吐蕃卒為邊患不可復制既併五詔乃卜太和形勝左  
洱水右蒼山山海之交結於子午遂築太和城自蒙舍  
徙居之立上下二關曰龍首曰龍尾連陷遼川水昌石

鼓沙追朕龍佉朕後遣其孫鳳伽異入朝唐授鴻臚少  
卿妻以宗女賜樂一部南詔於是始有中國之樂死子

閣羅鳳嗣

閣羅鳳之立以天寶八年故事酋長謁都督偕妻子行  
鳳挈家至雲南太守張虔陀皆私之復多徵求鳳怒反  
攻雲南殺乾陀取夷州三十二陷雋州獲唐西瀘令鄭  
回拜清平官即其國丞相也天寶十年夏四月庚寅劔南節度  
使鮮于仲通將命致討鳳伽異及段儉魏逆戰于西洱

河唐兵死者六萬人仲通僅以身免封儉魏為清平賜  
名段忠國以旌之遂臣于吐蕃吐蕃封之為東帝刻碑  
國門之外明叛唐非得已也僭國號曰大蒙始建年號  
曰贊普鐘十三年劔南留後李宓將兵擊之為蒙氏所  
誘全軍沒馬唐益發兵竟不能克前後死者二十萬人  
南詔自是始與中國隔絕矣代宗大曆十四年死偽謚  
神武子鳳伽異未嗣而死孫異牟尋立  
僭改元贊普鐘  
七長壽十一  
異牟尋以唐代宗大曆十四年嗣立有智數善撫衆居

史城

史城今喜州也

連兵吐蕃入寇唐神策都將李晟擊破之

異牟尋懼改城牟賧宜咩

今大理

改國號曰大理自稱曰

日東王僭封五嶽四瀆并立祠三皇廟春秋致祭以國

界內點蒼山為中嶽東川界江雲露松外龍山為東嶽

在今祿勸州一名絳雲露山一名雲龍

山有十二峯皆峭拔其山有共命鳥穴銀生部日界蒙

樂山為南嶽

在今者樂甸又名無量山其山千仞有一殿瑤柱自空中來天帝娶天女處

永

昌騰越界高黎共山為西嶽

在今騰衝一名崑崙隅東臨濃江西臨龍川左右有

平川名為穹甸草卉貫四序不凋瘴氣最惡冬雪至春方融夏秋穹甸炎熾商賈愁怨為之謠曰冬時欲歸來

高黎共上雪夏秋欲歸來無奈穹  
甸熱春時欲歸來囊中資糧絕  
麗江界玉龍山為北

嶽

在今麗江一名聳雪山其山九峯雪貫四時玉立  
萬仞千里望之若在咫尺與蜀松州諸山相接也以

黑惠江瀾滄江路江麗江為四瀆接點蒼之顛添洱河  
之永立官號曰九爽三托其地東至於銅柱鐵橋蟠桃  
玉榆東南至於交趾南至於驪國木落山西至於太石  
西北至於吐蕃北至於神川東北至於黔巫八方之地  
屬以八演從中國教令都曰苴咩別都曰善闡皆中國  
降人為之經畫也德宗貞元三年鄭回說以大義令復

歸唐異牟尋然之會西川節度使韋臯招撫羣蠻尋因  
求內附而猶結好吐蕃臯乃為書遺尋敘其歸化之誠  
轉至吐蕃吐蕃疑之異牟尋歸附之志益堅九年上表  
請絕吐蕃復臣於唐十年自將數萬人襲吐蕃大破之  
遣其弟獻圖納貢及吐蕃所頒金印請復號南詔唐以  
其功遣使冊之賜銀窠黃金印王北面跪受之宴使者  
出玄宗所賜器物指老笛工歌女曰皇帝所賜龜茲樂惟  
二人在耳使者曰南詔當深思祖考子孫勿替盡忠皇



唐對曰敢不敬使者之命死偽諡孝恒改元二

見龍子上元

尋閣勸嗣

尋閣勸以唐德宗貞元十五年立死子勸龍晟立偽諡  
孝文改元應道

勸龍晟以唐永貞元年立淫虐不道其臣差顛殺之而  
立其弟勸利晟諡曰幽改元龍興

勸利晟以唐憲宗元和元年立死偽諡靖王子晟豐祐  
立改元全義

晟豐祐以穆宗長慶四年立趨敢善用其下文宗太和三年西川節度使杜元穎不恤士卒有流入蠻境者蠻衣食之由是盡得蜀之虛實與其臣差穎遂謀入寇以蜀卒為鄉道襲陷邛戎雋三州引兵徑入成都取諸經籍大掠子女工技數萬人及珍貨而還南詔工技文織自是與中國埒矣豐祐乃遣使上表請罪元穎朝廷以李德裕代之德裕保障有方索南詔所掠百姓得四千人豐祐死偽諡昭成子世隆立改元二保和天啓

世隆之立以唐武宗會昌十三年初韋臯開蜀清溪道以通羣蠻入貢又選子弟聚之成都教之書數以羈縻之而軍府不時給其餼廩南詔因是不肯入貢及世隆立朝廷以其名同玄宗諱不行冊禮諭令更名謝恩然後遣使會世隆寇雋州事遂寢世隆乃僭稱皇帝懿宗咸通三年西寇安南四年寇交趾殺虜幾十五萬人留兵二萬使其將楊思縉據之谿洞夷獠皆降五年寇邕州敗還七年節度使高駢大破之復定交趾十年世隆

傾國入寇陷犍為及黎雅嘉三州十一年進攻成都不克引還僖宗乾符元年復寇西川陷黎州入寇邛峽關勝負不常二年攻雅州聞高駢改西川遣使請和駢發兵追至大渡河殺獲甚衆擒其酋長數十人四年復寇越嶲死於景淨寺自世隆嗣立以來為邊患殆二十年中國為之虛耗而其國亦弊偽諡景莊皇帝子隆舜嗣改元建極

隆舜

通鑑作法誤也南詔名皆父子相承世隆之子曰隆舜近是

之立以僖宗乾符

四年性好畋獵酣宴委國事於其臣是歲請和許之又  
迭請和親廣明元年遣宗正少卿李龜年充使中和元  
年上表款附三年以宗室女妻之後內嬖失道為豎臣  
楊登所弑偽諡宣武子舜化真嗣改元二貞明差耶

舜化真之立以唐昭宗乾寧四年改元中興上書於唐  
唐欲報以詔王建言小夷不足辱詔書臣在西南彼何  
敢犯塞從之立四年其臣鄭買嗣奪之而滅其國追諡  
孝哀蒙氏自細奴羅至舜化真十有三世立三百十年

而為鄭氏

鄭買嗣本唐鄭回之後世為蒙氏清平唐昭宗光化三年既滅蒙氏而自立改國號曰大長和改元曰安國死偽諡德桓子旻嗣立攻蜀黎州王建發兵大破之俘斬數萬級溺死數萬人求婚於南漢漢主以增城公主妻之改元五曰始元曰天瑞景星曰安和曰貞祐曰初歷死偽諡肅文子隆亶嗣立改元天應未幾為東川節度使楊干真所殺鄭氏三傳歷年二十有六而為趙氏

趙氏名善政為封民清平楊干真既殺滅鄭氏遂拔善政而立之後唐明宗之天成三年也改國號曰大天興立僅十月干真又奪之而為楊氏

楊氏名干真既奪趙氏而有蒙國改國號曰大義寧改元曰尊聖貪虐無道中外咸怨通海節度使段思平興師問罪干真不能禦走死楊氏立僅二年而段氏興焉段氏之先武威郡人有名儉魏者佐蒙氏有功賜名忠國擢清平官六傳而生思平思平生有異兆楊干真忌

之使人索捕思平逃匿得奇戟于品甸波大村又得神

驢於葉鏡湖

在雲南縣正南  
大波鋪是也

饑摘野桃剖之核膚有文

曰青昔思平折之曰青乃十二月昔乃二十一日今楊  
氏政亂吾當以是日舉義乎遂借兵東方黑巽松巽三  
十七部皆助之衆至河尾是夕思平夢人斬其首又夢  
玉瓶耳缺又夢鏡破懼不敢進兵其軍師董迦羅曰三  
夢皆吉兆也公為大夫夫去首為天天子兆也玉瓶去  
耳為王王者兆也鏡中有影如人有敵鏡破則無影無



影則無敵矣三夢皆吉兆也思平乃決明旦引兵欲渡  
莫知所從見江尾一婦被纓而浣者指曰人從我江尾  
馬從三沙矣爾國名大理從之得濟既逐楊氏而有蒙  
國遂改國號曰大理改元曰文德時後晉天福二年也  
死偽諡太祖傳子思英立未幾死偽諡文經武闕皇帝  
國人立其叔思良思良以後晉開運三年改元至治死

偽諡

原闕

傳子思聰

思聰以後周廣順三年立改元三曰明德廣德聖德死

偽諡

原闕

傳于素順

素順於思聰未如何屬也

素順以宋太祖建隆四年立時王全斌既平蜀欲因兵威取滇以圖進於上太祖鑒唐之禍基於南詔以玉斧畫大渡河曰此外非吾有也由是雲南三百年不通中國段氏得以睨臨燹燹以長世焉素順十七年改元明正死偽諡應道皇帝傳子素英素英以宋太宗雍熙二年立改元五曰廣明明應明聖明德明治死偽諡昭明傳于素庶

素廉以宋真宗祥符二年立改元二曰明啓乾興死偽  
諡敬明傳于素隆

素隆以宋天禧二年立改元曰明通天聖避位為僧死  
偽諡秉義傳于素貞

素貞以宋仁宗天聖四年立改元正治死偽諡聖德傳  
于素興

素興以宋慶曆元年立改元二曰聖明天明以無道國  
人廢之而立思廉

思廉以宋慶曆四年立皇祐中廣西儂智高掠廣州敗走大理狄青募死士使大理求之會智高已死於大理函其首至京師段氏至是始聞名於中國思廉立三十年改元四曰保安政安政德

原闕

死偽諡世宗傳子

連義

連義以宋熙寧八年立改元二曰上德廣安為其臣揚義貞所弑揚義貞篡立自號廣安皇帝凡四年段氏臣岳侯高智昇遣子昇太起東方兵討滅之而立段壽輝

壽輝連義  
之從子 壽輝立二年改元曰上明傳於正明

正明以宋元豐五年立改元三曰保立建安天祐避位  
為僧時國人皆歸心高氏遂奉高昇太為主而段氏中  
絕

高昇太有功段氏為國人所立以宋哲宗之元符二年  
立國改國號曰大中國改元上治臨終屬其子太明日  
段氏不振國人推我我不得已從之今其子已長可還  
其故物爾後人勿效尤也太明遵其遺言求段氏餘子

正淳立之而段氏復興號曰後理國高氏世相之賞罰政令皆由之國人稱為高國主波斯崑崙諸國來貢大理者皆先謁相國焉

正淳復國改元天授以高太明為相高太連為柵主遣太連朝宋求經籍得六十九家立十三年再改元曰開明文安避位為僧傳子正嚴死偽諡中宗

正嚴以宋徽宗大觀二年立四十年改元四曰日新永嘉保天廣運避位為僧傳子正興死偽諡憲宗

正興以宋高宗紹興十七年立改元四曰永貞太寶龍興  
盛明避位為僧傳子智興死偽諡景宗

智興以宋孝宗乾道八年立改元五曰利貞盛德嘉會  
元亨安定死偽諡宣宗傳子智連

智連以宋寧宗慶元六年立改元原闕死偽諡享天傳

弟智祥

智祥以宋寧宗開禧元年立改元天開仁壽死偽諡神

宗傳子祥興

祥興以宋理宗嘉熙三年立改元道隆甲辰元兵攻之  
高禾逆戰敗死宋遣使祭之祥興死偽諡孝義傳子興  
智

興智以元憲宗元年立改元天定壬子歲元呼必呼將  
兵擊之分三道進自臨洮經行山谷二千餘里浮金沙  
江以革囊濟進薄大理興智及高太祥拒戰大敗興智  
奔善闡太祥就擒不屈斬于五華樓下時白日當午忽  
雲起雷震世祖異之曰忠臣也遂虜興智滅其國段氏



自思平至興智二十二主歷三百五十年

元既滅段氏而有其地得五城八府蠻郡三十有七設大理都元帥府仍錄段氏子姓世守其土赦興智封為摩訶羅差管領八方興智死元季亂中原多故段氏復據之於是有十一總管出焉

一代總管曰信苴段實元中統二年入覲世祖嘉之賜璽書令總管大理善闡會川建昌永昌騰越諸郡以功累授行省參政以攻石城

今曲靖

及仁德府

今尋甸

功錫虎

符為總管

二代總管信苴段忠至元中隨元帥伐西林破會川通善闡平休林武定緬甸之役皆有功授金齒宣慰兼掌軍民萬戶府

三代總管信苴段慶元封為宣武將軍妻以公主入朝歸授雲南省叅政

四代總管信苴段正

五代總管信苴段隆

六代總管信苴段俊

七代總管信苴段義

八代總管信苴段光時元大德中中原板蕩梁王以元  
宗室鎮善闡與段氏分域構隙至大二年梁王大破光  
兵光將高蓬守羅那關梁王密招之不從乃賂蓬庖人  
刺蓬以其首獻梁王王并庖人戮之至治元年玉案山  
產小赤犬羣吠遍野占云天狗墜地為赤犬其下有犬  
軍覆境又時雨鐵民舍山石皆穿人物值之多斃謠俗

號曰鐵雨

九代總管段功初襲爵為蒙化知府至正十二年繼立  
為總管癸卯明玉珍自楚入蜀據之分兵四掠號曰紅  
巾明玉珍自將紅巾三萬攻雲南梁王及憲司官皆奔  
威楚諸部悉亂功謀于員外楊淵海淵海卜之吉乃進  
兵至呂閣敗紅巾于闕灘江殺獲千計紅巾收合餘眾  
再戰復勝殺段氏驍酋鐵萬戶紅巾屯古田寺段氏夕  
潛火其寺紅巾軍亂死者什七八又追至回磴關大敗

之紅巾大呼之曰待明年來復仇時功在戰間得玉珍  
母寄其子書云爾征南務得之不得輕還軍少糧乏我  
當添補楊淵海效其書跡易之曰中國兵來急爾宜早  
歸遂募能入紅軍營者有小卒陳惠願行玉珍得書恐  
國中有變又新失利遂急收軍功追之至七星關又勝  
之而還紅巾既退梁王深德段功以女阿結妻之為之  
奏授雲南平章功自是威望大著于西南梁王曲意奉  
之功戀戀不肯歸國其大理夫人高氏寄樂府促之歸

其詞曰風捲殘雲九霄冉冉逐龍池無偶水雲一片綠  
寂寞倚屏幃春雨紛紛促蜀錦半牀閒鴛鴦獨自宿好  
語我將軍只恐樂極生悲冤鬼哭功得書乃歸既而復  
往其臣楊智張希喬留之不聽既至善闡梁人私語梁  
王曰段平章復來有吞金馬嚙碧雞之心矣盍早圖之  
梁王始啓疑於平章密召阿結主命之曰親莫若父母  
寶莫若社稷功今志不滅我不已脫無彼猶有他平章  
不失富貴也今付汝以孔雀膽一具乘便可毒瘞之主

潸然不敢受命夜寂人定私語平章曰我父忌阿奴願  
與阿奴西歸因出毒具示之平章曰我有功爾家我趾  
自蹶傷爾父尚嘗為我裹之爾何造言至此三諫之終  
不聽明日邀功東寺演梵至通濟橋馬逸因令番將格  
殺之阿結主聞變失聲哭曰昨暝燭下纔講與阿奴雲  
南施宗施秀煙花殞身今日果然阿奴雖死奴不負信  
黃泉也欲自盡梁王防衛者乃萬方主愁憤作詩曰吾  
家住在鴈門深一片閒雲到滇海心懸明月照青天青

天不語今三載欲隨明月到蒼山悞我一生路裏彩錦被

也吐嚙吐嚙段阿奴吐嚙可惜也施宗施秀同奴歹歹不好也雲

片波潏不見人押不蘆花顏色改押不蘆乃北方起死回生草名肉屏

獨坐細思量肉屏駝背也西山鐵立霜瀟灑鐵立松林也平章從

官員外楊淵海亦題詩粉壁飲藥而卒詩曰半紙功名

百戰身不堪今日總紅塵死生自古皆由命禍福于今

豈怨人蝴蝶夢殘滇海月杜鵑啼破點蒼春哀憐永訣

雲南土錦酒休教灑淚頻梁王哀淵海之才縉意欲為



已用見詩痛悼之乃厚恤之令隨平章梈歸葬大理  
十代總管信苴段寶功之子洪武元年嗣職梁王遣矢  
刺平章七攻大理不克乃講和奏陞寶為雲南左丞未  
幾明玉珍復侵善闡梁王遣叔特穆爾達爾罕借兵大理時  
寶已長答書云殺虎子而還喂其虎母分狙粟而自詐  
其狙公假途滅號獻璧吞虞金印玉書乃為釣魚之香  
餌繡閨淑女自設掩雉之網羅况平章既亡弟兄罄絕  
今止遺一葵一奴奴再贅華黎氏葵又可配阿結妃如

此事諾我必借大兵如其不可待金馬山換作點蒼山  
昆明池改作西洱河時來矣書後附以詩云烽火狼煙  
信不符驪山舉戲是支吾平章枉喪紅羅帳員外虛題  
粉壁圖鳳別岐山祥兆隱麟遊郊藪瑞光無自從界限  
鴻溝後成敗興衰不屬吾梁王見之恨寶入骨平章女  
僧奴志恒不忘復仇將適建昌阿黎氏出手刺繡文旗  
以與寶曰我自束髮聞母稱父冤恨非男子不能報此  
旗所以識也今歸夫家收合東兵飛檄西洱汝急應兵

會善闡又作詩二章曰珊瑚勾我出香閨滿目潛然淚  
濕衣冰鑑銀臺前長大金枝玉葉下芳菲烏飛兔走頻  
來往桂馥梅馨不暫移惆悵同胞未忍別應知含恨點  
蒼低何彼穠穠花自紅歸車獨別洱江東鴻臺燕苑難  
經目風刺霜刀易塞膏雲舊山高連水遠月新春疊與  
秋重淚珠恰似通宵雨千里關河幾處逢後寶聞高  
皇帝開基金陵遣其叔段真自會川入京奉表歸款  
朝廷亦以書報之

見御製文集

時有妖巫女歌曰莫道君

為山海主山海笑諧諧園中花謝千萬朵別有明主來  
寶數日疾卒子明嗣

十一代總管信苴段明洪武十四年授以宣慰壬戌春  
正月天兵破鄯闡梁王自鴆黨屬悉俘明遣都使張元  
亨馳書潁川侯傅友德西平侯沐英麾下曰大理乃唐  
交綏之外國鄯闡實宋斧畫之餘邦難列營屯徒勞兵  
甲請依唐宋故事寬我蒙段奉正朔佩革篆比年一小  
貢三年一大貢友德怒拷辱其使明再上書曰漢武習

戰僅置益州元祖親征祗緣鄴闡乞冀班師友德  
答明書曰我大明龍飛淮甸混一區宇陋漢唐之  
小智卑宋元之淺圖天兵所至神龍助陣天地應符  
汝段氏接武蒙氏運已絕於元世寬命延息以至於  
今我師已殲梁王報汝世仇不降何待三月傅沐二  
將分兵宵緣點蒼顛繞出下關之背先樹旗幟遲明  
段兵驚潰大軍策馬亂流而濟明遂就擒并其二  
子仁義至金陵太祖聖諭曰爾父寶曾有降表朕不

忍廢賜長子名歸仁授永昌衛鎮撫次子名歸義

授鴈門衛鎮撫大理悉定是夏六月元巴延篤復

叛據佛光寨

在鄧州東北

額森布哈叛據鄧州甲子正月

十七日潁川侯傅友德復自七星關回軍大理平鄧川  
破佛光寨因定賦法築城隍設衛堡立學校比於中州

列郡焉

逸史氏曰史稱西南夷靡莫之屬以什數滇最大元封中以  
兵臨滇王舉國降然未有稱也及張氏受姓後世迭君長者

蒙氏鄭氏趙氏楊氏段氏高氏凡七姓惟蒙段最久故著稱  
焉夷裔盜名號互起滅若蜂蟻然不足錄也然至與中夏交  
綏抗陵疲我齊民世主甘心焉以無用戕有用是可慨已漢  
司馬氏傳西南夷誠有意哉余嬰罪投裔求蒙段之故  
於圖經而不得也問其籍於舊家有白古通玄峰年運  
志其書用熒文義兼衆教稍為刪正令其可讀其可載  
者蓋盡此矣滇熒於三代為荒服漢僅剽分其方雖元  
兵力勝之而不能守也于今列箚落而郡縣之馴鱗介

而衣裳之華風沃澤同域共貫昭代恢宇前是孰竝傳  
稱神農地過日月之表幾近是哉夫分隔之亂昔如彼  
大一統之治今若此干羽不警百五十年探言其故則  
金匱秘文縉紳罕睹况荒徼乎余慕宋司馬氏作通鑑  
采獲小說若河洛行年紀廣陵妖亂志者百二十家法  
孔子著春秋取羣書於百二十國也因是有感遂纂蒙  
段事以為滇載記其諸君子祖春秋而述二司馬氏者  
亦將有取於斯焉



真賞齋

古今說海卷十六